

【碗仔粿】李文煥原作

朋友對臺南帶來蓋有名个「麻豆碗仔粿」，食个時節愛淋合好个甜辣醬，咬啊去每一口都有肉丸同鹹卵黃，食起來蓋有在地風味。毋過，佢心肚裡最愛个，還係佢等客家个傳統美食——碗仔粿。該單純又虬个口感，分佢發夢都會尋味。該係佢童年个味緒，乜係家鄉个味緒，碗裡背裝个毋單淨係碗仔粿，乜係時間个影跡。

風定定仔吹過熟事个巷仔，碗仔粿淡淡个香味，同佢撻轉頭擺，輕輕仔推醒舊時个回憶。三十零年前，苗栗市个早晨總會分一聲一聲「碗仔粿哦！碗仔粿哦！」个聲音喊醒。該係賣碗仔粿个阿姨蓋嬌尸个聲音，佢每日會戴等笠嫲、蒙等洋巾，揸等滿滿兩籃仔个碗仔粿，行過莊頭巷尾一哪仔去賣。佢單淨賣兩種口味个碗仔粿：一種係鹹个，頂項有切啊幼幼个快菜、蘿蔔角同豆腐乾；另外一種係甜个，該係攤黃砂糖去做个，頂項麼个都無，毋過該甜甜个味緒，噯係佢最好食个口味。

其實，碗仔粿毋管係鹹个抑係甜个，總概都係佢盡好个米食。做麼个佢會恁好食碗仔粿呢？怕係胎教造成个。識聽

阿姆講，佢還佢个時節，病子啊蓋嚴重，食麼个就翻麼个，翻啊連膽汁都翻出來也。因為阿姆病子食毋落，一日一日瘦下去，阿爸踩踩踏踏毋知愛仰結煞正好。好得有一日，碗仔粿阿姨堵好揸擔經過，喊：「碗仔粿哦！好食个碗仔粿哦！」阿爸想：「就算買差也，乜定著愛買。碗仔粿雖然無麼个，但係有食總比無食好。」黏時就去買也兩碗，堵造化看阿姆食得落無？

麼个山珍海味都食毋落个阿姆，看著碗仔粿噯口涎落落跌，一下仔就呷啊極淨，無半息病子个現象。對該日開始，阿姆就每日等等碗仔粿阿姨，揸來正蒸啊好个碗仔粿，一直食啊到佢出世，故所頭擺佢還分人噏係「碗仔粿子」。

碗仔粿，毋單淨係一種食物，乜係一段情感个載體。見擺佢食一口碗仔粿，就像倒轉該無愁無慮个年代、倒轉該阿姨个擔仔脣、倒轉該燒暖个屋下。在這緊板个生活肚裡，碗仔粿係佢心靈个安慰、係佢記憶裡背永遠个甜。